

IMAQARNILIAQ US - Utoqqaat siunnersuisoqatigiiffiat 14-08-2017

Ulloq ataatsimiiffissaq Mandag 14. august 2017 kl. 18:00

Ataatsimiiffissaq Ataatsimiittarfik 1, Kommuneqarfiup Allaffia

Indholdsfortegnelse

Imaqarniliaq.....	3
-------------------	---

IMMIKKOORTOQ .: Imaqarniliaq

Imaqarniliaq Utoqqarnut siunnersuisooqatigiit inissitsiterlutik ataatsimiinnerat

Piffissaq: Ataasinngorneq 14. agusti nal. 14.00-16.00
Sumiiffik: Ataatsimiittarfik 1, Kommuneqarfiup Allaffia

Ataatsimeeqataasut:

Loritha Henriksen, ilaasortaq

Laannguaq Lynge, ilaasortaq

Bodil Karlshøj Poulsen, ilaasortaq

Elias Heilmann, ilaasortaq

Grethe Nielsen, Pisortaq

Birtha Bianco, utoqqarnik sullissinnermi fagcheffi

Lise Lotte Have, Inersimasunik Isumassuiffimmi fagcheffi

Jill Hellesen, Imaqarniliortoq

Peqataangitsut:

Søren Joelsen, ilaasortaq

Oqaluuserisassat:

- 1) Utoqqarnut siunnersuisooqatigiit aallarteqqaarnerat, saqqummiussisoq pisortaq Grethe Nielsen
- 2) Utoqqarnut siunnersuisooqatigiit aallarteqqaarnerat, saqqummiussisoq fagcheffi Birtha Bianco
- 3) Utoqqarnut siunnersuisooqatigiinni siulittaasumik siulittaasullu tullianik qinersineq
- 4) Taasariaqartut allat

Imaqarniliorneq:

1a. Utoqqarnut siunnersuisooqatigiit aallarteqqaarnerat, saqqummiussisoq pisortaq Grethe Nielsen

Tamassi tikilluaritsi. Ingerlatsivimmit ataatsimiinnissarput qilanaarisimavarput Utoqqarnullu siunnersuisooqatigiit nutaat suleqatiginissaat qilanaaralutigu. Utoqqarnut siunnersuisooqatigiisimasut misilittagaqarfigilluarparvut, taakkulu oqaloqatigilluartarsimallugit siunnersuutissarpassuarnillu tunniussaqaarsimapput.

Pisortap siunnersuutigaa peqataasut naatsumik imminnut ilisaritissasut, tassani ilaasortat tamarmik kikkunertik pillugu paasititsillutillu qineqqusaarnerminnut suna tunngavigisimanerlugu paasissutissiillutik.

Kaajallaalluni ilisartinneq:

Laannguaq: Utoqqarnut siunnersuisooqatigiinni sulineq soqutigisaraa qinigaaffimmilu 2013--imiit 2017-imut Utoqqarnut siunnersuisooqatigiinnut ilaasortaalluni. Laannguup sulilluarnini nangeqqikkusuppaa kommunimilu utoqqarnik sullissineq qanimut malinnaavigerusullugu. Ullumikkut Laannguaq ilaatigut nutserisarpog aasakkullu Nunatta Kujataanut nuannaarutigeqisaminik angalasarluni. 74-inik ukioqarpoq.

Loritha: Lorithap Utoqqarnut siunnersuisooqatigiinni sulinissani pissangalluni qilanaaraa. Loritha ukiorpassuarni utoqqalinersiallit allaffeqarfianni sulisareerpoq utoqqarnullu sullissinermi suliniutit pillugit soqutiginnittuartaullunilu malinnaaviguarpai. Loritha isumaqarpoq, inuiaqatigiinni utoqqarnik sullissineq soqutiginaruusoq ullumikkullu Utoqqaat nuna tamakkerlugu kattuffianni siulittaasuulluni. Tamakku saniatigut Loritha Nunatsinni Inuit Pisinnaatitaaffiinnut Siunnersuisooqatigiinni issiavoq, tassaniinnerminilu utoqqaat innuttaasut pisinnaatitaaffii sammisaralugit. 74-inik ukioqarpoq.

Bodil: Bodili Utoqqarnut siunnersuisooqatigiinnut ilanngukkusuppoq, illoqarfimmi maanna ukiuni 30-ni najugaqarfimmini nuannareqisaminilu utoqqarnik sullissinikkut tunniussaqaarnissaq pissanganartikkamiuk. Bodili soraarnerussutisiaqarnermini ilaannakortumik Allorfimmi aamma Transparency Greenlandimi suliffeqarpoq. Tamatuma saniatigut Bodili, Loritha assigalugu, Nunatsinni Inuit Pisinnaatitaaffiinnut ilaasortaavoq sunngiffimminilu spinningimi iltersuisuulluni, ernuttanilu aamma paarisarlugit. 66-inik ukioqarpoq.

Elias: Eliarsi kaammattorneqarnermi kingorna Utoqqarnut siunnersuisooqatigiinnut sassarpoq maannalu ilaasortatut peqataanini nuannaarutigalugu. Eliarsi Utoqqaat peqatigiinni ukiut qulit sinnerlugit ilaasortaavoq. Utoqqarnut siunnersuisooqatigiinni qulequttat assigiinngitsut eqqartornissaanut Utoqqarnullu siunnersuisooqatigiit sulineranni paasisimasaqarluarnissani pillugu qilanaarpoq, kiisalu paasisimasani Utoqqaat peqatigiinnut ingerlateqqikkusullugit. 71-inik ukioqarpoq.

Søren: SANA-mit aggersarneqarsimanini pissutigalugu maani peqataangilaq.

Birtha Bianco, Fagcheffi: Utoqqarnik sullissiviup ilaani fagcheffiuvoq, matumani kommunip utoqqarnik paaqqinniffiini, utoqqaat ornittagaani angerlarsimaffimmilu ikiorteqarnermi sulisut tamarmik fagcheffiuffigalugit, taakkulu katillugit kommunip illoqarfiini nunaqarfiinilu sulisut 230-t missaanniipput. Birtha sulinermini paaqqinniffiit ataasiakkaat ornittartussaagamigit, ilaatigut sulisunut paasissutissiiniarluni ilinniartitsiniarlunilu, angalangaatsiartarpoq. Aamma Birtha utoqqaat illuinut kommunip sanaartugaataanut akisussaasuvoq. Assersuutitut ilanngunneqarsinnaavoq,



Paamiuni utoqqarnik paaqqinniffiliortoqassaaq taannalu 2018-imi aggstip ulluisa aallaqqaataanni naammassereersimasussaavoq. Utoqqaat innuttaasut pitsaasunik piukkunnaateqarluartunillu sulisunit isumagineqarluarniassammata, kommunip utoqqaat illuini sulineq Utoqqarnut siunnersuisooqatigiinnit peqataaffigineqartumik pilerinarsarneqassasoq Birthap neriuutigaa.

Lise Lotte Have, Fagcheffi: Kommunip suliassaqarfiani Inersimasunik isumassuiffimmik taaneqartartumi aqutsisuuvoq, tassanilu suleqatigiit pillorissaasut, puiguttortut pillugit ataqatigiissaarisut marluk suleqatigiillu innersuussisartut utoqqarnik inunnillu innarluutilinnik sullissisuusut sulisorineqarput. Inersimasunik Isumassuiffimmi pillorissaasut aamma timimik sungiusaasut ilaatigut piginnaasanik attassiinnarumalluni eqaarsaartitsinermik, isumaginninnikkut teknologimik ikiorsiissutinik atuineramik suliaqartarput. Lottep susassaqarfianiipputtaaq utoqqarnik sullissinermi piginnaangorsaaqqinnernut, pitsaaliuineranut peqqissutsimillu siuarsaanernut tunngasut tamarmik.

Jill Hellesen, AC-mik fuldmægtigi: Jill Utoqqarnut siunnersuisooqatigiinnut allattaassaaq taannaassaarluni ataatsimiinnissanut atortussanik nassiussuisoq, ataatsimiigiaqqusisoq imaqarniliortorlu. Qaaguukkulluunniit attavigiuarsinnaavarsi.

Grethe Nielsen, Pisortaq: Isumaginninnermut Suliffeqarnermullu Ingerlatsivimmi pisortaavoq, tassaniippullu Inersimasunik Isumassuiffik, susassaqarfii utoqqarnut, inunnut innarluutilinnut, oqartussaaffeqarfinnut suliffeqarnermullu tunngasut. Isumaginninnermut Suliffeqarnermullu Ingerlatsivimmi sulisut 550-it missaanniipput ukiumullu katillugit 550 mio. koruunit missaanni missingersuusiortoqartarpoq.

1a. (nanginnera) Utoqqarnut siunnersuisooqatigiit aallarteqqaarnerat, saqqummiussisoq pisortaq Grethe Nielsen

Innuttaasut utoqqaat sivilunerusumik inuuneqartalersimanagerat kommunimi utoqqarnik sullissisunit aallutarineqarput taamaammallu innuttaasut utoqqaat amerliartorput.

Ukioq 2014-imiit 2017-imut kommunimi soraarnerussutisiaqalersimasut 970-init 1113-inut amerleriarsimapput. Utoqqaalli 66-iniit ukiullit amerleriarnerat annertunerujussuusinnaavoq, pissutigalugu 66-inik ukiullit tamarmik soraarnerussutisiaqartuunngimmata.

Utoqqaat amerliartuinnanngillat, aammali amerlanerusut peqqissut qiimasullu inuiaqatigiinni peqataarusuttut utoqqarnillu sullissinermi neqeroorutitigut sunniuteqarusuttut takussaaleralluttuinnarput. Utoqqarnut siunnersuisooqatigiinnut ilaasortat namminneerlutik utoqqaat eqeersimaarlutik ataatsimooqatigiit ilisaritissavaat.

Siunnersuisooqatigiit peqatigiiffillu pitsaasumik oqaloqatigisalernissaannut oqaloqatigiinnartarnissaannullu ingerlatsivitsinni pingaartitaraarput.

Taamaammatt peqatigiiffiit assigiinngitsut oqaloqatigiinnikkut ataavartumik ataatsimeeqatigineqartarput, taamaaliornikkummi iluarsisassat kisermaannagit ataatsimoorukkaangatsigit pitsaanerullutillu akikinnerusarput. Taamaattumik Utoqqarnut siunnersuisooqatigiit iluaqutaasussamik suleqatiginissaannut qilanaarpugut, tamatta tulluusimaarutigisinnaasatsinnik peqatigiilluta siunnerfilersortassagatta.

Utoqqarnut siunnersuisooqatigiit suliassaat

Utoqqarnut siunnersuisooqatigiit Kommunalbestyrelsimit qinigaapput taamaattumik tatigineqarluni utoqqarnut siunnersuisooqatigiinnut ilaasortaanermi sulineruvoq. Aamma imaappoq, Utoqqarnut siunnersuisooqatigiit qinigaaffiat Kommunalbestyrelsip ukiuni sisamani qinigaaffia malissavaa.



Utoqqarnik susassaqaarfimmi kommunip politikkiata ilusilersornissaanut aqqissuunnissaanullu atatillugu Kommunalbestyrelsimut siunnersortaanissaq kommunimilu innuttaasut utoqqarnut tunngatillugu qulequttanut oqalliseqataanissamut Utoqqarnut siunnersuisooqatigiit suliassarivaat.

Tamatuma saniatigut kommunimi innuttaasut utoqqaat Kommunalbestyrelsillu akornanni Utoqqarnut siunnersuisooqatigiit attaveqaataapput. Taamaammat utoqqarnut siunnersuisooqatigiinnut ilaasortatut utoqqarnut siunnersuisooqatigiit ataatsimiinneranit qulequttat paasissutissallu saqqummiunneqartut ingerlateqqikutsoorsinnaavasi.

Utoqqarnut siunnersuisooqatigiinnit siunnersuuteqassappat, Kommunalbestyrelsimut ingerlateqqinneqarnissaat pisortamit isumagineqassapput.

Utoqqarnut siunnersuisooqatigiit ataatsimiinnerannit imaqaarniliat tamanit takuneqarsinnaangortinneqassapput kommunillu nittartagaanut sermersooq.gl-imut ikkunneqarlutik. Imaqarniliattaq politikikkut ataatsimiititamut susassaqaartumut, tassa Isumaginninnermut Suliffeqarnermullu Ataatsimiititamut, Charlotte Ludvigsenip siulittaasuuffigisaanut, nassiunneqartassapput.

Tamatuma saniatigut Utoqqarnut siunnersuisooqatigiit ukiumut ataasiarlutik Isumaginninnermut Suliffeqarnermullu Ataatsimiititaq ataatsimeeqatigisarpaat.

Qinigaaffimmi kingullermi Ingerlatsivik, Utoqqarnut siunnersuisooqatigiit aamma Ataatsimiititaq utoqqarnut politikkip ataatsimut pilersinneqarnissaa eqqarsaatigalugu suleqatigiilluarput. Qinigaaffimmi matumani Utoqqarnut politikkimu aamma immikkoortumut pilersaarummi suliniutit tamarmik piviusunngortinneqarnissaat suleqatigiissutigineqassapput.

Suliat ataasiakkaat/suliat innuttaasunut tunngasut Utoqqarnut siunnersuisooqatigiinni oqaluuserineqarneq ajorput. Utoqqarnut siunnersuisooqatigiinni sulinissinni sulianut ataasiakkaanut tunngasunik paasisimasaqalissagaluarussi nipangiussisussaataaneq ilissinnut atuuppoq - aamma qinigaaffik naareerpat suli atuutissaaq.

Utoqqarnut siunnersuisooqatigiinnut ilaasortatut sulineq kajumissutsimik sulineruvoq akissarsiaqaataanilu.

Utoqqarnut siunnersuisooqatigiit maleruagassaat ilusilersorneqareerpoq taannalu borgmesterimit kommunaldirektørimillu atsiorneqareerpat ilissinnut nassiunneqassaaq.

Ingerlatsivimmi sulisut suleqatigalugit oqaluuserisassat maannamiit Utoqqarnut siunnersuisooqatigiit siulittaasuata ataqatigiissartassavai. Taamaattumik oqaluusererusutanik kissaateqarussi oqaluuserisassanut ilanngussaqaarusullusi, siulittaasorsi attavigissavarsi.

Laanguaq: Siunnersuisooqatigiinni maanna atuuttuni ilaasortat soq taamaallaat Nuuminngaanneernersut paaserusuppa.

Grethe: Sumiiffimmi sinniisitut qinigaaneq Utoqqarnut siunnersuisooqatigiinnut qinersineq atorneraarpoq, pissutigalugu qinnuteqartut eqqarsaatigalugit sumiiffimmi sinniisitut qinigaanissamut piumasaqaatit malinnissaanut annikippallaarsimmata. Tamatuma saniatigut kommunimi innuttaasut utoqqarnut tunngatillugu Kommunalbestyrelsimik siunnersuinissamut aqutissiuussinissamullu kikkut sakkussaqaqarluarnerpaanersut eqqarsaatigalugit ilaasortat piginnaasaqaqarluarnerisigut nukissaqaqarluarnerisigullu qinerneqartalissasut Kommunalbestyrelse aalajangerpoq.

Taamaammat kommunimi illoqarfinni nunaqarfinnilu tamani utoqqaat tamarmik sinnerlugit Utoqqarnut siunnersuisooqatigiit sulipput.



Loritha: Ippinnartoqartippaattaaq illoqarfinit allanit ilaasortaaitaqartoqanginnera taavalu kommunimi illoqarfinni allani utoqqaat pitsaanerpaamik Siunnersuisooqatigiinnit suleqatigilernissaannut eqqartorneqarnissaa kissaatigalugu.

Grethe: Illoqarfinni nunaqarfinniluunniit allani inunnik peqatigiiffinnilluunniit oqaloqateqarusukkaanni, videokonferencikkut ingerlanneqarsinnaanera periarfissaavoq. Tamatuma periarfissaanissaanut ingerlatsivik ikiutissaaq. Tamatuma saniatigut Siunnersuisooqatigiinnik pilersitsisoqarsimanera ingerlatsivimmit ersarissarneqarlunilu paasissutissiisoqassaaq aamma kina siulittaasunngorsimansoq kinalu siulittaasup tulliatut qinigaasimansoq nalunaarutigalugu, taakku saaffigineqarsinnaammata.

Bodil: Utoqqarnut siunnersuisooqatigiinni sinniisutuaasoq, Jonas Napatoq, Nuummiinnera iluatsinneqarsinnaavoq. Illoqarfimmiitilluni sinniisutut sulinissaminut pissarsiniassagami Utoqqarnut siunnersuisooqatigiit ataatsimiinnerani peqataasinnaassava?

Grethe: Maleruagassatigut tamanna akerlerineqangilaq.

Loritha: Utoqqaat peqatigiit Utoqqarnut siunnersuisooqatigiinnit paasissutissanik pineq ajortoq, Eliarsip eqqaavaa. Nipangiussisussaaitaaneq eqqarsaatigalugu killissaa sumiippa – Utoqqaat peqatigiinnut paasissutissanik qanoq tunniussaqaarsinnaatitaavugut?

Grethe: Paasissutissanik inunnut tunngasut ingerlateqqeqqusaanngitsut pineqartillugit ersarissuliorfigisassavatsigit. Aallaaviatigut suulluunniit eqqartukkasi ammasuupput aamma ataatsimiinnernit imaqarniliat tamaasa tigusinnaavasi ingerlateqqillugillu. Utoqqaat peqatigiinnit aamma taamaaliorneq nuannaarutaassaaq.

Laanguaq: Ilassutigalugu oqaatigiinnarusuppara, Utoqqaat peqatigiinnut ilaasortat Utoqqarnut siunnersuisooqatigiinnik ataatsimeeqateqarnissamik kissaateqarsinnaapput.

2a. Utoqqarnut siunnersuisooqatigiit aallarteqqaarnerat, saqqummiussisut fagcheffi BIRTHA BIANCO aamma fagcheffi LISE LOTTE HAVE

Lotte aamma BIRTHA: Utoqqaat pillugit immikkoortumut pilersaarummit suliniutaasut tamarmik Lottemit aamma BIRTHAMIT isumagineqarput. Allanguinissamik annertuumik sulinertaqartussaavoq, taamaattoqarnissaanilu sulisunik aamma innuttaasunik allanik, soorlu utoqqarnik, kajumissutsimik sulisunik, qanigisaasunik allanillu peqataatitsinissaaq pisariaqarpoq.

Utoqqaat pillugit immikkoortumut pilersaarummi suliniuterpasuartigut utoqqarnik nutaamik isiginninnissaaq pisariaqarpoq, ilaatigut utoqqaat ataasiakkaat nalingiillutik suli tunniussaqaartut arlaqarmata inuunerminnillu suli qiimasutut nammineertutullu inuunnarnissamut ikorfartortariaqarlutik.

Utoqqaat ingerlatsivimmit attavigineqartartut arlallit taakkuupput ilaatigut utoqqarnik paaqqinniffinni inissaqarnissamut, angerlarsimaffimmi eqaarsaartarnissamut imaluunniit sungiusartarnissamut ikiortariaqartartut ikorfartortariaqartullu. Kommunimi "paaqqutarineqalernissaaq sioqqullugu sungiusartarneq" aallutaraarput, taannaavorlu piginnaanngorsaanermut suliniutaasoq, taamaaliorortoqartarporlu innuttaasup utoqqaap ikiortariaqarneranik annikillisaaneq, kinguartitsineq pitsaaliuinerlu anguniarlugit siunnerfilimmik sungiusarnissamik pilersaarusiortarnikkut. Taamaaliornikkut innuttaasut timikkut piginnaasaat annikillisimagaluartut eqeersimaartumik isumaqarluartumillu inuuneqarnissaannik ikorfartorpavut innuttaasullu nammineernerunissaannut angerlarsimaffimminilu najugaqaannarnissaanut periarfissaqarluarnerulersillugit.

Taamatut suliniuteqarnissamat sulisorisatta akornanni siuarsarnissaq allannguinnissarlu pisariaqarpoq anguniakkattalu angunissaanut pillorissaasut, timimik sungiusaasut, angerlarsimaffimmi ikiortit il. il. pikkorissut pisariaqartippavut. Piginnaanngorsaaneramik suliniuteqarnermi sulisutsinnit innuttaasup nammineernerunissaanut allatullu eqqarsalernissaanut ikorfartorneqassaaq.

Timimik sungiusaasut ilaatigut utoqqaat peqqissut 75-ileereersimasut angerlarsimaffiinut pulaartarpaat, pulaarnerinilu kommunip neqeroorutaa pillugu paasisutissiisarlutik atorussukkunikku innuttaasooq sussanersoq paasititsisarlutik.

Tamatuma saniatigut utoqqarnik paaqqinniffimmi naluttarfimmilu allanilu sungiusarnissamat neqerooruteqarpoq. Innuttaasut ikiorneqarnissamik ikorfartorneqarnissamilluunniit pisariaqartitsisutut misigippata, kommunimut saaffiginnissinnaasut Utoqqarnut siunnersuisooqatigiinnit kaammattorneqarsinnaapput.

Tamatuma saniatigut 2017-imi oktobarip qaammataaniit angerlarsimaffimmi ikiorteqarneq ulloq unnuarlu atuutilissaaq, innuttaasullu timikkut piginnaasakillissimasut taamaalillutik angerlarsimaffimmini najugaqaannarnissamat periarfissaqarlutik. Pisariaqartitat tunngavigalugit angerlarsimaffimmiiginnarneq inuunermi pitsaassuseqarnerunermik, kiffaanngissuseqarnerunermik naleqarnerunermillu nassataqartoq upperaarput. Taamatut suliniuteqarnikkutaaq innuttaasut utoqqaat utoqqarnik paaqqinniffinnut nuuttariaqarnerat kinguarsarsinnaavarput. Inuiaqatigiit agguataarnerisa allaatiginerat taamatut allanngoriartuinnartillugu utoqqalisartut amerliartorput taakkulu utoqqarnik paaqqinniffinni inissanik pisariaqartitsisinnaallutik, taamaattumik taakkununga utoqqisut allassimaffiata takivallaalinnginnissaa aallutarineqassaaq utoqqarnillu paaqqinniffinnik sanaartorneq iluamik ingerlassalluni.

Innuttaasut utoqqaat amerlasuut angerlarsimaffiini ikorfartorneqartarnerisa kingunerissavaa, innuttaasut napparsimanerulernissaat ajorsinerulernissaallu naggataatigullu utoqqarnik paaqqinniffimmiittariaqalernerat misigissavarput. Taamaattoqartillugu utoqqarnik paaqqinniffinni sulisut amerlanerusut piukkunnaatilittullu peqqissutsimik suliaqarlutik paaqqinninnissaanut neqeroorsinnaasunik amerlanerusunik atorfinitsitsinissaq pisariaqalissaaq.

Grethe: Nunanut sanilitsinnut sanillersuutissagutta, Nunatsinni utoqqaat utoqqarnik paaqqinniffinnut pisartut siusissukkut pisarput, pissutigalugu innuttaasut angerlarsimaffiini ikiornissaanut ikorfartornissaannullu taakkutulli periarfissaqarsimannginnatta. Kommuneqarfik Sermersuumi innuttaasut utoqqarnik paaqqinniffinni agguaqatigiisillugu najugaqartarput ukiut 6-t missaanni sanillersuussissagaannilu Danmarkimi ukiut 2-sarput, Islandimi ukiut 3,8-sarput Savalimmiunilu ukiut 4-sarlutik.

Loritha: Utoqqaat sapinngisamik sivilisuumik angerlarsimaffimmini najugaqaannarnissaat eqqarsaatigalugu, Kommune Kujallermi innuttaasut makku pineqartut kalerrisaaruteqalernissaat eqqartorneqalersimavoq. Kommunitisinni tamanna pillugu qanoq ippa aamma taamatut atortorissaaruteqartitsinikkut toqqissisimanermik tuninissaanut periarfissaqarpa?

Lotte: Ukioq 2015-imi kommune aningaasaliiffiqeqarpoq, ilaatigut innuttaasut nammineq angerlarsimaffimmiinnittut kalerrisaarutissaannik pisinissamat atugassanik. Kommunitisinni ullumikkut innuttaasut 25-t kalerrisaarutiniq peqarput peqartullu amerliartorlutik.

Kalerrisaarisarneq angerlarsimaffimmi ikiortinut atavooq.

Tamatuma saniatigut innuttaasut angerlarsimaffiini isumaginninnikkut teknologii atorlugu ikiuutiniq atuisut amerliartorput. Tamanna pillugu Utoqqarnut siunnersuisooqatigiit tusagaqaqqikkumaarput aammalu isumaginninnikkut teknologii kommunimi atorineqartut takullugillu misilissavaat.



Bodil: Ilinniartitsinissamat pilersaaruteqarneq, assersuutigalugu angerlarsimaffimmi ikiortinut, pingaaruteqartuuvoq. Suliniutigisassinni nutaani piginnaasaqarlualernissamat periusissiaatisi siunniussasilu allat ilisarinnaavakka. Siunissami pikkorissartitsinerni utoqqaat ilinniartitsissutini peqataatinnissaat takorloorneqarsinnaanerluni?

Birtha: Utoqqarnik peqataatitsinissarput piukkullugu eqqartussavarput. Isummassarsiatsialaavoq.

Grethe: Innuttaasut utoqqaat sinnerlugit ilaatigut Utoqqarnut siunnersuisooqatigiinni siulittaasooq ilinniartitsinermi peqataatinneqareerpoq.

Elias: Angerlarsimaffinni kalerrisaaruteqartarnissamat periarfissaqarneq assorsuaq soqutigintippaa. Utoqqaat peqatigiinni eqqartorneqarsimanersut eqqaamangilai. Utoqqaat assersuutigalugu uppissimagunik oqarasuaallu imaaliillaannaq tikissinnaanagu ikiorserneqarnissaq sivirusinnaammat, kalerrisaarutinik ikiuutitut atugassanik peqarnissaq isummassarsiatsialaavoq.

Illumik/ininik ornittakkamik/ornittakkanik Utoqqaat peqatigiit ajornartorsiutigisaannut tunngatillugu Eliarsip saqqummiuppaa. Tamanna arlaleriarlugu eqqaaneqartarpoq peqatigiiffiullu init atortagai mikivallaarput isumannaallisaaanerlu eqqarsaatigalugu illersorsinnaanngilaq ilaatigut ikuallattoqalissagaluarpas.

Grethe: Utoqqaat peqatigiiffiata init atugai Utoqqaat nuna tamakkerlugu kattuffiata atortagaattaq pillugit ajornartorsiut ingerlatsivimmit ilisimaneqarpoq. Tamanna ingerlatsivimmit eqqumaffigineqarpoq juunillu qaammataani kingullermik ataatsimiinnermi Utoqqaat peqatigiiffialu eqqartorneqarluni. Nuummi ininik illunillu amigaateqartoqarpoq, tamannali sulissutigineqarpoq.

Lotte: Nuannaarutigalugu oqaatigissavarput, 2017-imi oktobarip qaammataani sulisut ilinniarsimangitsut 20-t peqqinnissamat ikiortitut ilinnialerlutik aallartissapput. Sulisut pineqartut tassaapput, ukiorpassuit sulisimasut misilittagartuut, ilinniakkamik naammassinnissimangitsut. Sulisut taakku pineqartut suliatigut eqqortunik tunniussaqaarnissaat eqqarsaatigalugu atuagarsornikkut ilinniagaqaarnissaat amigaataavoq. Ukioq ataaseq qaangiuppat oqarsinnaalissaagut ilinniarsimangitsut 20-t ilinniakkamik naammassinnissimasut. Ilinniartitaanermi akissarsiatik attatiinnassavaat suliffimminnilu suliffimmik misiliitinneqassallutik. Imaalissaq suliatigut piukkunnaateqarnerusumik innuttaasut pisariaqartitaanik isumaginissinnaalerlutik neriuutigaarpullu sulisut akornanni naammagisimaarnikkut sulisullu ataasiakkaat sulinerminni iluarisimaarnikkut pitsaanerulissasoq.

Birtha: Paamiunittaaq sulisut ilinniarsimangitsut pillugit annikinnerusumik aallartitsisoqassaaq.

Najugaqartut utoqqaat iluaqutissaannik sulinermi sunik ilinniagaqarusuttoqarnera tunngavigalugu ilinniartitaaneq ingerlanneqassaaq. Ukiamut tamanna aallartissaaq.

3a. Utoqqarnut siunnersuisooqatigiinni siulittaasumik aamma siulittaasup tullianik qinersineq

Utoqqarnut siunnersuisooqatigiinnut ilaasortat isumaqatigiillutik kissaatigaat, inissitsiterneq tamarmiullutik pissasoq. Kissaatigaallu inissitsiterneq kinguartinneqassasoq, taamaalilluni Søren Joelsen peqataassamat.

Ataasinngorneq aggustip ulluisa 21-anni ataatsimiittoqarnissaa ingerlatsivimmit aqqissuunneqassaaq.

Oqarasuaatikkut peqataanissaq periarfissaavoq.



4a. Taasariaqartut allat

Utoqqaat inuillu innarluutillit ukiumut pisuttuartinneqartarnerat ingerlanneqassaaq, sapaammi aggustip ulluisa 20-anni.

Aaqqissuussamut kajumissutsimik sulisussat amerlanerusut pisariaqartinneqarput.

Laanuguaq: Kajumissutsiminik peqataarusuppoq.

Elias: Utoqqaat peqatigiiffiat sapaatiuppat aliikkusersuinertalimmik peqataassaaq ilaatigullu utoqqaat erinarsoqatigiit tallimanik atuissallutik.

